



**Agpanunotka a nalaing ket dimo bannogen
ta bagim iti tarigagaymo a bumaknang.
Mabalin a mapukaw ti kuartam iti
apagdarikmat a kasla ketdin naaddaan
iti payak ket tumayab a kasla agila.**

Dagiti Proverbio 23:4-5



Intuloy na a kinuna kadakuada amin: “Kitaenyo ket agannadkay iti amin a kita ti kinaagum. Ta ti pudno a biag ti tao saan a maibatay iti sanikua, uray no kasano ti kinabaknangna.” Sinaritana kadakuada daytoy a pangngarig, “Adda idi baknang a nawadwad ti apitna. Kinunana iti bagina: ‘Ania ngata ti aramidek? Awan umanay a pagipempenak iti apitko. A, ammokon! Daytoy ti aramidek: Rakrakekto dagiti sarusarko, ket mangbangonakto kadagiti daddadakkell a pagipempenan iti apitko ken dadduma a sanikuak. Ket kunakto iti bagik: ‘Naggasatkan, bagi, ta adda amin a masapulmo iti adu a tawen. Aginanaka, manganka, uminumka, ket agragsakka.’ Ngem kinuna ti Dios kenkuana: ‘Maag! Ita met la a rabii, matayka. Ket amin dagitoy nga urnongmo, siasinonto ti agtagikua?’” Ket inggibus ni Jesus, “Kastanto ti pagbanagan dagiti agurnong iti adu a sanikua nga agpaay kadakuada, ngem napanglawda iti imatang ti Dios.”

SAN LUCAS 12:15-21

Nasdaaw dagiti adalan gapu kadagitoy a saona, ngem intuloy ni Jesus ti nagkuna, “Annakko, anian a nagrigat ti sumrek iti Pagarian ti Dios! **SAN MARCOS 10:24**

Adda aya magunggona ti tao no matagikuana ti entero a lubong ngem mapukawna met ti biagna? Awan! Awan ti mabalin nga ited ti tao a pangsubbot iti biagna.

SAN MARCOS 8:36-37

No naagumka iti kuarta, awanto ti pannakapnekmo. No tarigagayam ti bumaknang, dimo maala amin a kayatmo. Awan serserbina. **ECLESIASTES 5:10**

Ikabilmo ti panagayatmo kadagiti bambanag iti ngato, saan a kadagiti bambanag iti daga. TAGA-COLOSAS 3:2

Ngem ti kinadlios a buyogen ti pannakapnek ket dakkel a gunggona. Ta awan ti inyegmi ditoy lubong, ket sigurado nga awan ti maaramidmi. Ket gapu ta addaantayo iti taraon ken pagan-anay, mapnektayo koma iti dayta.
1 TIMOTEO 6:6-8

Dika agtalek iti panangirurumen, ket saanka nga ubbaw iti panagtakaw: no umadu ti kinabaknang, dimo ikabil ti pusom kadakuada. DAGITI SALMO 62:10

Saan koma nga agtakaw ti nagtakaw, no di ket agtrabaho koma babaen kadagiti imana iti banag a nasayaat, tapno masapul nga itedna iti agkasapulan. TAGA-EFESO 4:28

Ilakoyo ti adda kadakayo, ket mangtedkayo kadagiti limos; mangipaaykayo kadagiti bagbagiyo kadagiti pitaka a saan a lumakay, maysa a gameng iti langlangit a saan nga agkurang, a sadiay awan ti mannanakaw nga umasideg, wenno ti kuton a mangdadael. Ta no sadino ti ayan ti gamengmo, sadiay met ti ayan ti pusom.
SAN LUCAS 12:33-34

Ngem no mangtedkayo iti limos, saanyo nga ipakaammo ti makannigid nga imayo no ania ti ar-aramiden ti makannawan nga imayo: Tapno dagiti limosyo ket nalimed: ket ni Amayo a makakita iti nalimed, gunggonaannakayto a sipapanayag. SAN MATEO 6:3-4

Nagasat ti tao a tumulong kadagiti napanglaw;
isalakanto ni Yahweh iti tiempo ti riribuk.
DAGITI SALMO 41:1

Depensaanyo dagiti napanglaw ken awanan ama:
aramidenyo ti hustisia kadagiti marigrigat ken
agkasapulan. DAGITI SALMO 82:3

Matnagto ti agtalek iti kinabaknangna; ngem rumang-ayto
ti nalinteg a kas maysa a sanga. DAGITI PROVERBIO 11:28

Adda a mangpabaknang iti bagina, ngem awan ti aniaman:
adda a mangpangpanglaw iti bagina, ngem addaan iti
dakkel a kinabaknang. DAGITI PROVERBIO 13:7

Agbasol ti mangumsi iti padana a tao, ngem ti maasian
kadagiti napanglaw, naragsak isuna.
DAGITI PROVERBIO 14:21

Ti maasian kadagiti napanglaw agpautang iti Apo; ket isu
supapakannanto ti intedna. DAGITI PROVERBIO 19:17

Ti nasayaat a nagan ket nasaysayaat a mapili ngem ti
dakkel a kinabaknang, ken naayat a pabor imbes a pirak
ken balitok. DAGITI PROVERBIO 22:1

Mabendisionanto ti addaan iti naparabur a mata; ta itedna
ti tinapayna kadagiti napanglaw. DAGITI PROVERBIO 22:9

Saanto nga agkurang ti mangted kadagiti napanglaw,
ngem ti mangilemmeng kadagiti matana adunto ti lunod.
DAGITI PROVERBIO 28:27